

Siunnersummut oqaaseqaatit

Oqaaseqaatit nalinginnaasut

1. Aallaqqasiut

2023-mut Aningaasanut inatsimmut oqaasertaliussami EU-p sinniisoqarfiani sulisut, taakkulu ilaquaat EU-llu allaffia akileraarutinik akitsuutinillu akiliisussaannginnissaannik aamma akileraartarnermi akitsuusiisarnermilu inatsisit malillugit pisussaaffinnik allanik akiliisussaannginnissaannik tunngavissaq ilanngunneqarpoq. Tunngavissaq taanna siunnersuut manna aqutigalugu akileraartarnermi inatsisinut nalinginnaasunut nutartikkamut ilanngunneqarpoq.

Inatsisini atuuttuni allassimasut aamma Naalakkersuisut paasissutissiisussaatitaanermik nalunaaruteqartussaatitaanermillu il.il. aalajangersaanissamut piginnaatinneqarnerisa arlalitsigut erseqqissarneqarnissaat siunnersuutaavoq. Taamattaaq Naalakkersuisut naatsorsueqqissaarnissami il.il. atugassanik nalunaaruteqartussaatitaanernik nutaanik peqqusinissamut nutaamik piginnaatinneqarnissaat pisariaqartinneqartoq paasinarsivoq.

Tamatuma saniatigut siunnersummi, pisassarisat naatsorsuiffimmi erniaat 100 kr.-uppata ikinneruppataluunniit akileraaruseriffik ernialersuinnginnissamut tunngavissinneqarpoq. Immikkullu pisoqartillugu akileraaruseriffik ernialersuinermik unitsitsinissamut kiisalu suliap suliarineqarnerani annertuumik kukkusoqartillugu pisassaranut ernialiunneqartunik tamakkiisumik ilaannakumilluunniit isumakkeerinissamut tunngavissaqalissaq.

Kiisalu inatsit, Aningaasarsianit akileraarutit pillugit Inatsisartut inatsisaanni allannguutit UKA 2023/18-imut siunnersuutikkut saqqummiunneqartut malitsigisaannik aaqqiivigineqarlunilu ilaneqarpoq, tassani amigartoorteqarnermi missingiilluni inissiinerup nalinginnaasumik suliareqqinnejarnissaanut killiliussap sivitsorneqarnera ilanngullugu.

2. Siunnersuutip imarisai pingarnerit

2.1. Kattuffit nunat akornaneersut akiliisussaannginnissaat

Naalagaaffit aallartitai, sinniisui il.il. aallartitaaffianni assigiinngitsutigut immikkut pisinnaatitaaffeqartarput, eqqartuussisulersunneqarsinnaanatik akileraartussaatitaanatillu. Tamanna naalagaaffit aallartitai pillugit naalagaaffit Wienimi isumaqatigiissutaanni aamma sinniisoqarfii pillugit naalagaaffit Wienimi isumaqatigiissutaanni allaqqavoq. Soorlu Kalaallit Nunaata Bruxellesimi aallartitai Bruxellesimi akileraartussaatinnejaratik Kalaallit Nunaannulli akileraartussaallutik.

Issittumut tunngasut, pingartumillu Kalaallit Nunaata soqtigineqarnerulernerisa kingunerisaanik ilimagineqassaaq kattuffit suliffeqarfiillu nunat akornaneersut Kalaallit

Nunaanni immikkoortortaqarfeqalersinnaanerat. Tamanna ilaatigut EU-p Kalaallit Nunaanni allaffeqalerniarnerata takutippaa.

Nunat allat aallartitaasa sinnisoqarfisalu akileraartussaatinneqannginnissaat Nunatsinni akileraartarnermi inatsisini periaarfissaavoq, tassa naalagaaffit Wienimi isumaqatigiissutaanni allaqqasut assigalugit. Maleruagassat atuuttut, kattuffiit allat nunat akornaneersut tassunga assingusumik akileraartussaannginnissaat pillugu piginnaatitsisummik imaqanngillat. Tassa imaappoq kattuffiit nunat akornaneersut naalagaaffimmut nunamulluunniit sinnisuunngitsut, kattuffiulli nunami allamiittup il.il. ataani immikkoortortasut allaffiusulluunniit, nunaminnut sinniisutut assigisaatulluunniit maaniittutut akileraartarnikkut akitsuusiisarnikkullu piginnaatitaaffeqanngillat.

Nunat allat kattuffinnik il.il. nunat akornaneersunik akileraartarnermut tunngatillugu, naalagaaffit Wienimi isumaqatigiissutaat malillugu, minnerpaamik naalagaaffit aallartitaqarfiisa aallartitaasalu assinganik atugassaqartitsisarnerat immikkullu piginnaatitaaffeqartitsisarnerat nalinginnaavoq. Taamatut immikkut piginnaatitaaffit danskit naalagaaffiata inatsit, lov nr. 567, 30. november 1983, lov om rettigheder og immuniteter for internationale organisationer malillugu akuersissutigisinggaavai.

Akileraartarneq akitsuusiisarnerlu Namminersorlutik Oqartussat suliassarai. Naalakkersuisut inuaat akornanni isumaqatigiissutini akileraartarnermi taamatut ileqkoqartillugu immikkut piginnaatitaaffiliisinnaanissamut ilangussinissaq siunnersuutimikkut kissaatigaat.

Tamatumani siunertaavoq kattuffiit nunat akornaneersut Kalaallit Nunaanni immikkoortortaqalersut, sinnisoqarfinni aallartitanut sulisunullu allanut nunartik sinnerlugu aallartitaasunut atugassarititaasunut assingusunik neqeroorfigineqarnerunissaat. Taamaammat siunnersuutaavoq Akileraaruserinermik ingerlatsineq pillugu Inatsisartut inatsisaanni piginnaatitsisummik, akileraartarnermut akitsuusiisarnermullu tamarmut atuuttumik ilangussisoqarnissaa. Akileraaruserinermik ingerlatsineq pillugu inatsimmi inissinneqarneranut pissutaavoq inatsisip akileraartarnermut akitsuusiisarnermullu tunngasunut tamanut atuuttunera.

Akileraarutinik akitsuutinillu akiliisussaannginnissap saniatigut siunnersuutip imaraa pisussaaffinnik akileraartarnermi akitsuusiisarnermilu inatsisini allaqqasunik, aningaasanik tunniussinermi akileraarutinik uninngatitsisussaanermik, akileraaruseriffimmuit qinnuteqaatinik nassisissarnissamik, nammineerluni nalunaarsuinissamik, nalunaaruteqartarnissamik paasissutissanilluunniit tunniussinissamik il.il. pisussaaffiliinnginnissaq.

2.2. Nalunaaruteqartussaanerit pillugit maleruagassat nutarterneri

Inatsimmi kapitali 6-ip, paasissutissanik nalunaarutiginnittarnermut tunngasup oqaasertaasa arlalitsigut allanngortinnejarnissaat erseqqissarnejarnissaallu siunnersuutaavoq.

Nalunaaruteqartussaanerit nutarternejarnissaai siunertaavoq, maleruagassanimmi nutaanik ukiuni arlalinni ilaartorneqarnikuummata. Tamakkununnga tunngasut ilutigisaanik siunissami maleruagassanik nutaanik ilaartorneqartariaqtarnissaat naatsorsuutigineqassaaq, tassa Kalaallit Nunaata nunat akornanni akileraartarneq pillugu paasissutissanik paarlaasseqatigiittarnissaq pillugu isumaqatigiissuteqarfiginikuummagit.

Tamanna tunngavigalugu siunnersuutaavoq piginnaatitsissutit pillugit maleruagassat assigiinngitsut maanna atuuttut Naalakkersuisunut nalinginnaasumik piginnaatitsissutit maleruagassamut ataatsimut katersorneqarnissaat, ilutigisaanillu taanna nalunaaruteqartussaatitaasunik tamanik, inatsisip kapitali 6-iani maanna pineqartunik ilaneqassasoq.

Inatsimmi § 33-mut innersuussinerit nutarterlugillu ilaneqarnerisigut erseqqissarnejassasoq Naalakkersuisut akileraaruseriffimmut paasissutissanik tunniussisarneq pillugu maleruagassanik erseqqinnerusunik aalajangersaasinnaasut, matumani ilanngullugu nalunaaruteqartussaatitaasut assigiinngitsut paasissutissiisarnissaannut piumasaqaatinik oqilisaasinnaaneq siunnersuutaavoq.

Qaammatikkaartumik nalunaaruteqartarnissaat pillugit maleruagassanik aalajangersaanissamut piginnaatitsissut oqaasertamik allannguinikkut ilaneqarpoq.

Maleruagassap nalinginnaasup Naalakkersuisut nalunaaruteqartussaatitaanerit inatsisip kapitali 6-iani aalajangersagaareersut pillugit pisussaaffinnik nutaanik annertunerusunilluunniit aalajangersaasinnaanerannik periarfissiinngilaq.

Nalunaaruteqartussaatitaaneq maanna atuuttut qanoq iliorluni akileraaruseriffimmut tunniunneqartarnissaat pillugu maleruagassanik erseqqinnerusunik aalajangersaanissamut piginnaatitsissut atuuttoq periarfisseereerpoq. Tamatumani nalunaaruteqartussaatitaasut, tassa sulisitsisut, pisortat oqartussaasut il.il., qarasaasiakkut nalunaaruteqartarnissaat pillugu maleruagassat pineqarputtaaq. Piginnaatitsissutip nalunaaruteqartussaatitaasunut tamanut atuunnera ilassuteqarnikkut erseqqissarnejarpoq.

Kapitali 6-imi allannguutitigut pisariillisaanissaq siunertaavoq, tassa kapitalimi aalajangersakkat siunissamut piareernerisa saniatigut aammattaaq atuaruminarnerulerlutillu paasiuminarnerulernissaat, Kalaallimmi Nunaata akileraartarnermut tunngasut pillugit paasissutissanik nunat akornaniittunut, aamma Danmarkimut paarlaasseqateqartarerata kingunerisaanik inatsisit siunissami allanngortarnissaat naatsorsuutigineqarmat.

Kapitali 6-ip allannngortinna malitseqartillugu tamatumunnga tunngasut pillugit nalunaarut nutarterneqartussaavoq; taanna tassaavoq Aningaasarsianit akileraarutit pillugit paasissutissanik nalunaaruteqartarneq pillugu Namminersorlutik Oqartussat nalunaarutaat nr. 8, 18. juni 2010-meersoq.

Paasissutissiisussaatitaanerup atuuttup allannguallatsinnissa aamma siunnersuutaavoq, tassa sulisartup Kalaallit Nunaannut akileraartussaanera kippatt sulisitsisup, ukiup ingerlanerani aningaasarsiaasut akileraarutilu A-t uninngatinneqartut pillugit paasissutissanik nassiuussinissaakileraaruseriffimmit qinnutigineqarsinnaalersillugu. Maleruagassaq maanna atuuttoq sulisitsisup ukiumoortumik januarip qaammataata naannginnerani nalunaaruteqartussaatitaaneranut tapertaavoq. § 31 malillugu paasissutissiisussaatitaanerup soraernerussutisiaqarnissamut inuunermullu sillimmasiinermut aaqqissuussinernut akiliutit kiisalu taakku A-mut akileraarutai uninngatinneqartut pillugit paasissutissanik ilaneqarnissa siunnersuutaavoq.

Akileraaruseriffiup il.il. inatsisit atuuttut malillugit taamatut qinnuiginnittarnissaasa ikittuinnaasarnissaat ilimagineqarpoq. Taamaammat paasissutissanik pineqartunik ilanngussinerup paasissutissiisussaatitaasunut akileraaruseriffimmulluunniit allaffissornikkut malunnaatilimmik suliakkersuutaanissa ilimagineqanngilaq.

2.3. Akileraarutit agguaanneqartarerat pillugu maleruagassat ilaneqarnerat naleqqussarneqarnerallu

Ingerlatseqatigiiffiit Erngup nukingata nukissiornermut atorneqartarnera pillugu Inatsisartut inatsisaat naapertorlugu akuersisummik pigisaqartut aningaasarsianit akileraarutaasa iluanaarutisianillu akileraarutaasa Nunatta karsianit pisassarineqarnerat erseqqissarneqassasoq siunnersuutaavoq. Tamatuma ingerlatseqatigiiffinnut aatsitassat pillugit inatsit naapertorlugu akuersisummik peqartunut atuuttup assigaa.

Tulliatut siunnersuutaavoq ernianit akileraarutit, Aningaasarsianit akileraarutit pillugit Inatsisartut inatsisaata allannngortinneqarnissaanik siunnersummi siunnersutigineqartutut Nunatta karsianit, kommunimit akileraarfiusumit kommuninillu agguarneqarnissaat.

2.4. Iluanaarutisianit akileraarutinik il.il. utertitsinissamut piffissaliussat pillugit maleruagassat

Ingerlatseqatigiiffiit inuillu nunami Kalaallit Nunaata marloriaammik akileraarnissaq pillugu isumaqatigiissuteqarfigisaani angerlarsimaffeqartut iluanaarutisiaminnit akileraarutinik, ingerlatseqatigiiffimmit Kalaallit Nunaanni angerlarsimaffeqartumit iluanaarutisiat tunniunneqarneranni uninngatinneqartunik utertitsiffigineqarnissamut periarfissaqarsinnaapput. Aningaasarsianit akileraarutit pillugit Inatsisartut inatsisaanni allannguutit kingunerisinhaavaat iluanaarutisianit akileraarutinik utertitsisarnerit amerleriarnissaat, tassa qinnuteqaatit utertitallu aningaasartaasa amerlinerisigut.

Taamaattumik siunnersuutaavoq akileraaruseriffiup iluanaarutisianit akileraarutinik kiisalu royltynik erniallu akileraarutaannik utertitsivigineqarnissamik qinnuteqaatinik suliaqartarnerata sivisunerusumik piffissalerneqarnissaa atuutilersinneqassasoq.

Maleruagassat atuuttut malillugit akileraaruseriffiup qaammammi qinnuteqaammik tigusaqarnerminit, tak. inatsimmi § 44, kingusinnerpaamik qaammatip tulliata naanerani utertitassanik tunniussinissaq pissaaq. Piffissaliussaq qaangerneqarpat qaammatit aallartinneri tamaasa 1 procentimik ernialersuisoqassaaq. Akileraaruseriffiup qinnuteqaammut tunngaviusoq misissorsinnaanngippagu, tamannalu utertitsivigineqarnissamik qinnuteqartumut tunngasunik pissuteqarpat piffissaliussaq kipitinneqassaaq.

Maleruagassat maanna atuuttut akileraaruseriffiup utertitsivigineqarnissamik qinnuteqaatinik suliaqarnissaanut sivikitsuinnarmik piffissaliipput. Akileraaruseriffiup suliaqarnissamut, matumani aamma piginnittuuneq il.il. pillugit paasissutissanik pissarsiniarnermut naammattumik piffissaqarnissaq qulakkeerniarlugu siunnersuutaavoq, akileraaruseriffik iluanaarutisianit akileraarutinik, royltymut akileraarutinik erniallu akileraarutaannik utertitsinissamik qinnuteqaatinik suliaqarnissamut sivikinnerpaamik qaammatit arfinilinnik piffissaqassasoq.

Siunnersuutaavortaaq akileraaruseriffik tunniussinissamini qularnaveeqqusiissummik piumasaqarnissamut piginnaatinneqassasoq. Tamannali taamaallaat atuutissaq iluanaarutisianit akileraarutinik utertitsivigineqarnissamik piumasaqarneq isumaqatigiinngissutigineqarpat, suliarlu Akileraarusiinermi Aalajangiisartunit eqqartuussivinnilluunniit suliarineqarpat.

2.5. Ernialersuinermut tunngavissamik annertusisitsineq

Siunnersuutaavoq akileraaruseriffik ernialersuinermik unitsitsinissamut aammalu akileraarutit akiitsuutaannut ernialiunneqareertunik maannakkornit pisartunit amerlanerusuni utertitsinissamut piginnaatinneqassasoq. Allannguut akileraartartunut amerlanngitsunut, akileraarutinut akiitsuminnut kukkusumik ernialersuiffigineqartunut pingaaruteqartussatut nalilerneqarpoq. Kiisalu ernialiussat aningaasartakitsut ikilinissaat akileraaruseriffiup allaffisorneranik oqinnerulersitsissaaq.

2.6. Amigartoorteqarnikkut nalinginnaasumik suliarinneqqittarnermut killiliussap sivitsorneqarnera

Akileraarusiinikkut amigartoortit atornissaannut piffissaliussap sivitsorneqarnerata ataqtatigiinnea qularnaarniarlugu, nalinginnaasumik akileraarutinik annertussusiliinerup suliareqqinnejqarnissaanut nalinginnaasumik killiliussap aamma ukiunik marlunnik kinguartinneqarnissaa siunnersuutaavoq, taamaallaalli amigartoorteqartup, amigartoortip ukiut tallimat sinnerlugit kinguartinnissaanik nalunaarutiginnissimancerani. Siunnersuut

ilaatigut naatsorsuutinik atortussiat toqqorsimanissaannut malittarisassat tunuliaqutaralugit naatsorsuusiorissaatitaasut atortussianik ukiuni tallimani toqqorsimannitussaataanerat tunuliaqutaralugu qissiminneqassaaq. Siunnersuutikkut suliffeqarfiit naatsorsuusiornermi atortussianik naapertuuttunik tamanik ukiut tallimat sinnerlugit toqqortaateqarnissaannik peqquneqarput. Tassa ukiut tallimat qaangerlugit akileraarusiinikkut amigartoorutinik atorneqannngitsunik kinguartitsinissamik kissaateqassagunik.

Tamanna pillugu aalajangersagaq aningaasarsianit akileraarusiisarneq pillugu Inatsisartut inatsisaata allanngortinneqarneranut siunnersuummi tusarniaassutigineqartumi ilaatinneqaqqalarluarpoq. Tusarniaanerup kingorna allannguut § 47 a-tut siunnersummut uunga ilanngunneqarpoq, aalajangersagarmi akileraaruserinermik ingerlatsineq pillugu Inatsisartut inatsisaanniippoq, tassanilu nalinginnaasumik akileraarutissamik inissiinermut killiliussat malittarisassiorneqarput.

3. Pisortanut aningaasaqarnikkut allaffissornikkullu kingunerisassat

Kattuffiit nunat akornaneersut akileraartarnikkut akitsuusiisarnikkullu pisussaaffeqannginnissaannik akuersisarnissamut tunngavissamik ilanngussinissaq pillugu siunnersuut aningaasatigut annertuumik kingunerisassaqanngilaq. Kattuffiit nunat akornaneersut Kalaallit Nunaanni immikkoortortaqarfegaleqalerniarunik allaffimmik, kattuffiuup sinniisutullu aallartitamik il.il. nunani allani pineqarnerattuulli Kalaallit Nunaanni atugassaqartinneqarnissaat pisariaqartissagaat naatsorsuutaasinnaavoq. Akileraartussaatitsinnginnissat taakku nunami maani immikkoortortaqalernermi aatsaat akuerineqartussaammata tamanna isertitassatigut annaasaqaataassangatinneqanngilaq. Aningaasaqarnikkut kingunerisassat aamma eqqoriarneqarsinnaanngillat, siunissamimi inuiaat akornanni isumaqatigiissutaasussat qanoq imaqassaneri apeqqutaalluinnartussaapput.

Aningaasarsianit akileraarutit pillugit Inatsisartut inatsisaanni allannguutissat kingunerisinnaavaat iluanaarutisianit akileraarutinik utertitsivigineqarnissamik qinnuteqaatit amerlinissaat, taamaalillutilu utertinneqartartut tamarmiusut amerlillutik. Iluanaarutisianit akileraarutinik il.il. utertitsivigineqarnissamik qinnuteqaatit ilaasa suliarineqarnissaannut piffissap sivilunerunissaanik siunnersuutip siunertaa pingarneq tassaavoq, akileraaruseriffiuup qinnuteqaatinik tamakkuningga suliaqarnissaminut naammattumik piffissaqarnissaanik qulakkeerinninissaq. Suliassat suliarineqarnissaannut piffissap siviluneruneraatigut utertitassat kingusinaartumik tunniunneqarnerisa kingunerisaannik erniatut akilerneqartartut amerlinerunissaat pinngitsoortinneqassasoq naatsorsuutaavoq. Ilutigitillugu qinnuteqaatinik suliaqarneq misissuinerlu piffissaqarfingeqarnerulerpat isertitassat annaaneqarsinnaanerat millissaq, utertitassammi tigusisunut tunineqartussaanngikkaluartunut kukkusqarneratigut tunniunneqarpata tamanna pisinnaassagaluarpmat. Piffissaliussap siviluneruneraatigut aningaasaqarnikkut kingunerisassanik siumut naatsorsuisoqarsinnaanngilaq.

Naalakkersuisut maleruagassat atuuttut naapertorlugit piginnaatinneqarnerisa erseqqissarne-qarnerat isertitassanut sunniuteqassangatinneqanngilaq. Akerlianilli paasissutissanik amerlanerusunik, naatsorsueqqissaarnissami il.il. atugassanik ingerlateqchinneqartussanik akileraaruseriffimmut nalunaaruteqartarnissaq pillugu maleruagassanik Naalakkersuisut aalajangersaanissaannut piginnaatitsisummiq annertusisitsinissamik siunnersuut piffissaq ungasinnerusoq eqqarsaatigalugu allaffisornermut 0,5 mio. kr.-nik atortutigullu ineriartortitsinermut ataasiartumik 0,5 mio. kr.-t missinginik aningaasartuuteqarnerulerermik kinguneqassaaq. Aningaasartuutissat apeqqutaatillugit ukiumoortumik aningaasanut inatsisinut atatillugu pingaarnersiuinernut ilaatinneqarsinnaapput.

Akileraaruseriffiup erniat aningaasartaat 100 kr.-ugaangata ikinnerugaangataluunniit ernialersuinnginnissamut tunngavissinnejarnissaa pillugu maleruagassiatut siunnersuut pisortat isertitassatigut ukiumut 7 mio. kr.-t missinginik annaasaqaatigisassagaat naatsorsuutaavoq. Paasissutissat maanna pigineqartut tunngavigalugit nalilerneqarsinnaanngilaq aningaasat taakku ilaat qanoq amerlatigisut susoqaraluarpalluunniit isertinneqarsinnaanngitsutut nalikillilerneqarsinnaassanersut.

Aalajangersakkap akileraaruseriffimmut piginnaatitsinerusup nassatarisaanik allaffissornikkut oqilisaasoqarnissaa aningaasaqarnermilu qarasaasiatigut atortut pigineqareersut oqilisaaffigineqarnissaat pisinnaapput, tassa ernianik akiligassiisarnerup akiliisitsiniartarnerullu annikillinerisigut. Allaffissornikkut suliassanik annikillisaaneq ukioq naallugu suliap sisamararterutaa ataallugu naleqassangatinneqarpoq.

Erngup nukinganik isumaluutinik nukissiamik tunisassiornermut akuersissutilinnit isertitanit akileraarutit Nunatta Karsianut nakkartarnissaannut siunnersuut, siunissaq qaninnerusoq isigalugu aningaasatigut kinguneqaateqassanngilaq, maannakkummi akuersissutinik taamaattunik tunniussaqartoqanngilaq. Akuersissutinik tunniussisoqassappat tamanna kommunini erngup nukinganik atuiffinni pisortallu karsiini allani aningaasanik agguuaqqinermik malitseqassaaq.

Immikkut ittumik pisoqartillugu ernialersuinerup unitsinnejarnissaanik kiisalu pisassarisanut ernialiunneqartut, suliap suliarineqarnerani annertuumik kukkusqartillugu tamakkiisumik ilaannakumilluunniit isumakkeerneqarnissaannik tunngavissaq pillugu maleruagassatut siunnersuutigineqartup isertitassatigut ukiumut 1 mio. kr.-t inorlugit annaasaqaataanissaa naatsorsuutaavoq.

4. Inuussutissarsiuutinik ingerlatsisunut aningaasaqarnikkut allaffissornikkullu kingunerisassat

Siunnersuut inuussutissarsiuutinik ingerlataqartunut isertitassatigut allaffissornikkulluunniit taasarialimmik sunniuteqarnissa naatsorsuutaanngilaq. Pingaartumik oqaatigineqassaaq nalunaaruteqartussaatitaanerit atuutereersut allanngortinneqanngimmata.

5. Pinngortitamut, avatangiisinut inuillu peqqissusaannut kingunerisassat

Siunnersuut avatangiisinut pinngortitamulluunniit taasarialinnik kinguneqartussaanngilaq. Siunnersuut aamma inuit peqqissusiannut kinguneqartussaanngilaq.

6. Innuttaasunut kingunerisassat

Siunnersuut innuttaasut, pisuni aalajangersimasuni akileraarutinut akiitsuminnut ernialersuinermik unitsitsinissamut periarfissippai.

7. Kingunerisassat pingaarutillet allat

Siunnersuut inuiaat akornanni isumaqatigiissutini akileraartussaanngitsitsinissamik periarfissiivoq.

Siunnersuut naalagaaffeqatigiinnermut tunngasunik imaqanngilaq.

8. Oqartussaasunik aamma kattuffinnik il.il. tusarniaaneq

Siunnersuut 12. maj 2023-mit 9. juni 2023-mut makkununnga tusarniaassutigineqarpoq: Sulisitsisut (GE), NUSUKA, Sulinermik Inuussutissarsiuuteqartut Kattuffiat (SIK), BDO, Deloitte, BK Revision, EY Grønland, Grønlands Revisionskontor, Nunatsinni Advokatit, Grønlandsbanken, BankNordik, SISA, Naalakkersuisut Siulittaasuata Naalakkersuisoqarfia, Nunanut Allanut, Inuussutissarsiornermut Niuernermullu Naalakkersuisoqarfik, Ineqarnermut Attaveqaasersuutinullu Naalakkersuisoqarfik, Nunalerinermut, Imminut Pilersornermut, Nukissiutinut Avatangiisinullu Naalakkersuisoqarfik, Aatsitassanut Inatsisillu Atuutsinneqarnerannut Naalakkersuisoqarfik, Isumaginninnermut, Suliffeqarnermut Nunamullu Namminermut Naalakkersuisoqarfik, Aalisarnermut Piniarnermullu Naalakkersuisoqarfik, Meeqananut, Inuuusuttunut Ilaqutariinnullu Naalakkersuisoqarfik, Peqqinnissamut Naalakkersuisoqarfik, Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik, Avannaata Kommunia, Kommune Qeqortalik, Qeqqata Kommunia, Kommuneqarfik Sermersooq aamma Kommune Kujalleq.

Siunnersuut Naalakkersuisut tusarniaaviatigut www.naalakkersuisut.gl -ikkut tamanut saq-qummiunneqarpoq.

Tusarniaanermi akissutit pisariaqarneri tunngavigalugit siunnersuutip suliarinerani ilanganneqarput.

Tusarniaaneq pillugu allakkiaq ilanngussaq 2-miittoq innersuussutigineqarpoq.

Siunnersuummi aalajangersakkanut ataasiakkaanut oqaaseqaatit

§ 1-imut

Nr. 1-imut

Immikkoortoq 1 a nutaaq, kapitali 3 a nutaaq § 10 a-lu nutaaq nunat tamat akornanni kattuffiit, taakku sulisui taakkulu ilaquaat akileraarutinut akitsuutinullu akiliisussaatitaannginnissaat siunertaralugu siunnersuutigineqarpoq.

Kattuffiit suliffeqarfíillu nunat akornaneersut taakkualu sinniisutitaasa kiisalu taakku ilaquaasa akileraartarnermi akitsuusiisarnermilu maleruagassat atuuttut atuutilertussallu naapertorlugit akileraarutinik, akitsuutinik pisussaaffinnillu akiliisussaatinneqannginnissaat pillugu Naalakkersuisut isumaqatigiissutitigut akuersisarnissaannik sukumiisumik piginnaatitsinissaq siunnersuutaavoq.

Aalajangersakkap imartussusianut pissutaavoq aalajangersakkap pingarnertut siunertarimma-gu, Naalakkersuisut akileraartussaatitsinnginnissamik il.il., annertutigut naalagaaffiit Wienimi isumaqatigiissutaani allassimasut assinginik akuersinissamut piginnaatinneqarnissaat. Taamaattumik inatsimmi aalajangersagaq piaaraluni imartuumik oqaasertaqartinneqarpoq. Imartussusia suullu akilerneqartussaatinneqassannginnerat inuaat akornanni isumaqatigiissutini erseqqisumik aalajangersarneqartassapput, soorluttaaq taakku allaffisornermi suliarineqartarnissaannut periusissaq erseqqinnerusumik aalajangersarneqarsinnaasoq.

Akileraartussaatitsinnginneq siullertut tassaasinnaavoq kattuffimmut atuuttoq, tassa Kalaallit Nunaanni allaffiit illuutillu kattuffiup sulinissaani pisariaqartinneqartut ilanngullugit. Taman-na isumaqarpoq kattuffik assersuutigalugu nioqqutissanik qamutinillu motoorilinnik eqqussuinerminut aamma pigisamik aalaakkaasumik pisinerminut atatillugu eqqussuinermi akitsuutinik naqissusiinermilu akitsuutinik akiliisussaatinneqassanngitsoq.

Akiliisussaatitsinnginneq aamma tassaasinnaavoq aningaasarsianik A-nik il.il. tunniussinermut atatillugu akileraarutinik A-nik unerartitsisussaatitaannginneq nassuiaateqartussaatitaannginnerlu.

Aalajangersakkap imm. 2-ani aalajangersagaavoq akiliisussaatitsinnginnerit inunnut nr. 1-imut 3-mut taagorneqartunut atuussinnaasut.

Aalajangersakkap nr. 1-iani taaguut aallartitatut atorfegartut assersuutigalugu tassaasinnaapput allaffimmi aalajangersimasumik atorfegartitat, sulisut teknikkimik suliallit kiisalu kiffatut sulisut. Aallartitat ilaquaat aamma aalajangersakkami pineqartunut ilaa-sinnaapput. Aallartitat aappaasa qitornaasalu aallartitaq ilagalugu aallartut taamatuttaaq akileraarutinik akiliisussaatinneqannginnissaat nunat akornani akuersaagaalluni

atorneqarluartuuvoq. Aappaasorli tikeqataasoq assersuutigalugu Kalaallit Nunaanni suliffeqaleruni, inuussutissarsiornikkulluunniit tassani annikinngitsunik isertitaqaruni isertitat taakku Kalaallit Nunaanni akileraaruteqaatigisussaavai.

Aalajangersagarli pisut apeqquataillugit aamma sulisut atorfiniffiusumi Kalaallit Nunaanni najugaqartut tassaniittulluunniit akileraartussaatinnejannginnissaannut tunngavigineqassaaq. Sulisut taakku akileraartarnikkut kattuffimmit pineqartumit aallartitat allat assigalugit akileraartarnikkut inisisimaffeqassapput. Taamatut iliuuseqarneq nunatsinni innuttaasut sulisinnaanermik periarfissaannik pitsannguissaq, taamaalillunilu nunat tamat akornanni sulinermi ilisimasaat paasisaallu annertunerulissallutik.

Aalajangersakkap nr. 2-ani taaguut paasisimasallit tassaavoq immikkut ilisimasallit teknikkikkullu siunnersortit kattuffiup aalajangersimasumik sulisorisaanut ilaannngitsut. Assersuutigalugu tassaasinnaapput immikkut ilisimasallit kattuffiup suliniutini immikkut ittuni suliaqartussatut atorfinititsitai.

Aalajangersakkami nr. 3 malillugu inuit saqitsaassutit suliarineqarneranni kattuffik sinnerlugu peqataasut aamma akileraartussaatinnejanngissinnaapput.

Nr. 1-imisulli nr. 2-3-lu sulisunut, suliffeqarfinnut il.il., piffissami kattuffimmik isumaqati-giissuteqarfigisaminni Kalaallit Nunaanni angerlarsimaffeqartut, najugaqartut tassaniittulluunniit akileraartussaatinnejannginnissaannut tunngavigineqarsinnaanngillat.

Aalajangersakkap imm. 3-ani Naalakkersuisut isumaqatigiissutit taaneqartut naammassineqarnissaat pillugit iliuusissanik erseqqinnerusunik aalajangersaanissamut piginnaatinnejarput. Tamanna pisinnaavoq nalunaarutini maleruagassanik erseqqinnerusunik aalajangersaanikkut, ilitsersuutinik atuutilersitsinikkut, imaluunniit nioqqutissanik aamma qamutinik motoorilinnik il.il. eqqussuinermi akitsuuserneqartussaanngitsunik suliaqarnermi periusissanik aalajangersaanikkut.

Nr. 2-mut

Inatsimmi § 30 a, imm. 2-mi kukkunermik aaqqiinerinnaavoq.

§ 30 a-mi aalajangersagaq 2016-imi ilanngunneqarpoq. Aalajangersakkap imm 2-ani inatsit § 30, imm. 1, nr. 5 aamma 6 pineqarput. Innersuussineq taanna § 30, imm. 1, nr. 4-mut aamma 5-imut iluarsineqarpoq. Tassani akileraartartup kinaaneranut tunngatillugu paassisutissanut innersuussineq pineqarpoq.

Nr. 3-mut

§ 31, imm. 1-imi inatsimmi § 30 a-mut innersuussineq ilanngunneqarpoq.

Inatsimmi § 31 malillugu paasissutissiisussaatitaaneq aatsaat atorneqassaaq tigusisoq (sulisoq) Kalaallit Nunaannut akileraartussajunnaarsimappat aammalu aatsaat akileraaruseriffik qinnuiginnissimappat.

Paasissutissiisussaatitaanerup ilaneqarnissaa siunnersuutaavoq, taamaalillutik soraarnerussutisiaqarnissamut inuunermullu sillimmasiinermik aaqqissuussinernut akiliutit kiisalu taakku akileraarutaat A-t uninngatinneqartut pillugit paasissutissat pineqartunut ilanngunneqarlutik. Paasissutissat pineqartut sulisitsisunit ilisimaarineqareerput.

Allannguutip tassunga ilutigitillugu kinguneraa akileraartussaasup taassumaluunniit sinniisuata, tak. aalajangersakkami imm. 2, akileraaruseriffiup taamaaliorssinnaaneratuulli paasissutissiisussaatitaasoq (nalunaaruteqartussaatitaasoq) qinnuigisinnaammagu paasissutissanik piffissami siusinnerusumi tunniusseqqullugu.

Nr. 4-mut

Siunnersuutaavoq inatsimmi § 30 a-mut innersuussineq inatsisip § 32-ani ilanngunneqassasoq.

Tassani soraarnerussutisiaqarnissamut inuunermullu sillimmasiinermut aaqqissuussinernut akiliutit pillugit § 30 a naapertorlugu paasissutissiisussaatitaanerup 1. januar 2018-imi atuutilersup kingunerisaanik allannguineq pineqarpoq.

§ 30 a-mut innersuussinermik ilanngussinerup kinguneraa aningaasarsiortup paasissutissat namminermut tunngasut § 30 a malillugu tunniunneqartut assinginik tunineqartussaanera. Tassa paasissutissiisussaatitaasup aningaasarsiortoq paasissutissat akileraaruseriffimmut tunniussani pillugit ilisimatissavaa. Tamanna aningaasarsiortup akissarsiaata allagartaatigut amerlanertigut pisareerpoq.

Nr. 5-imut

Aalajangersagaq 2006-ip kingorna allanngortinneqanngilaq. Aalajangersakkap imaraa Naalakkersuisut paasissutissiisussaatitaaneq pillugu erseqqinnerusumik maleruagassiornissamut arlalitsigut piginnaatinneqarnerat. Piginnaatisissutit taakku imm. 1-imit 3-mut allannguutissatut siunnersuutitigut erseqqissarneqarnissaat siunnersuutaavoq. Maannamut periusiusup ingerlatiinnarneqarnissaa naatsorsuutaavoq.

Imm. 1-imut

Inatsimmi § 33, imm. 1-imut ilanngunneqarput inatsimmi §§ 33 a-33 g-mut kiisalu § 35-39-mut innersuussinermik, kiisalu oqaasertamik allannguineq, qaammatikkaartumik nalunaaruteqartarnerit aammalu ilisimatitsisussaatitaanerit pillugit maleruagassanik aalajangersaanissamut piginnaatisissumvik annertusisitsisoq. Ilisimatitsisussaatitaanernik

oqarnermi pineqartoq tassaavoq akileraaruseriffimmut nalunaarutiginninnermi pineqartumik ilisimatitsinissaq.

Inatsit § 33 c, imm. 3-ani aamma § 33 d, imm. 2-mi piginnaatitsissutit suliatigut peqatigiiffiit nalunaarutigisatik pillugit ilaasortaminnut ilisimatitsisussaatitaanerat pillugu maleruagassiornissami kiisalu Namminersorlutik Oqartussat nalunaarutigisatik pillugit ilinniagaqartunut ilisimatitsisussaatitaanerat pillugu maleruagassiornissami atugassatut atuutiinnarneqarput.

Piginnaatitsissut annertusineqarpoq, taamaalillutik Naalakkersuisut nalunaaruteqartussaatitaasut inatsit kapitali 6-iani pineqartut allat ilisimatitsisussaatitaanissaat pillugu maleruagassiorsinnaanngorlugit.

Tamatumani ilisimatitsisussaatitaanerit inatsimmi § 35 a, imm. 7-imi aamma imm. 8-mi aalajangersarneqartut, aningaasaqarnikkut ingerlatsiviit isumannaallisaanerup akornusigaanerani il.il. ilisimatitsisussaatitaanerannut tunngasut, nalunaarutikkut maleruagassiuunneqarsinnaanerat aamma ilaavoq. Tamannali aningaasaqarnikkut ingerlatsiviit § 35 a, imm. 7 aamma imm. 8 malillugit pinngitsooratik ilisimatitsisussaatitaanerannik allannguinngilaq. § 35 a, imm. 7 aamma imm. 8 malillugit ilisimatitsisussaatitaanerit pinngitsooratik pisartussaanerat 2016-imi ilanngunneqarpoq, taamaammallu taakku qasukkarneqarsinnaanngillat.

Piginnaatitsissut qaammatikkutaartumik nalunaarutiginnittarneq pillugu maleruagassanik aalajangersaanissamut periarfissiisoq erseqqissarneqarpoq.

Paragrafinut innersuussinernik erseqqissaanerullunilu ilanngussineruvoq. Naalakkersuisut paasissutissanik tunniussisarneq pillugu maleruagassanik aalajangersaasinnaanerat erseqqissarneqarpoq.

Imm. 2-mut

Naalakkersuisut nalunaaruteqartussaatitaanernik qasukkaanissaq pillugu maleruagassiorsinnaanerat nalinginnaasumik piginnaatitsissutit ingerlatiinnarneqarpoq. Aalajangersagaq nutaaq periutsimik atuuttumik erseqqissaanerusoq, tassa nalunaaruteqartussaatitaasut tamarmik paasissutissiissutigisassaat pillugit piumasaqaatinik qasukkaasinnaaneq pineqarpoq.

Taaguutit paasissutissiisussaatitaasut aamma nalunaaruteqartussaatitaasut inatsimmi assigiimmik isumaqartillugit atorneqarsorinarpot, taamaalillunilu taaguutip arlaata toqqarnerani inatsisigut inissisimanermi assiginngissuteqartoqanngilaq.

Maleruagassat atuuttut malillugit Naalakkersuisut, soorlu ilinniagaqarnersiutit, qitoranut akiuersuitit, pisortanut tunisat aamma attartorernik isumaqtigiiissutit aalajangersimasut, suliaqartut peqatigiiffiinut ilaasortaanermi akiliutit, kontunik isumaginnittut nalunaarutaat, aningaasat isumagineqartut taarsigassarsiallu pillugit nalunaarutinik paasissutissiisussaatitaanermik qasukkaanissamut piginnaatitaanertik akileraaruseriffimmut isumagisassanngortinnikuuat.

Periutsip taassuma nalunaarut ilaneqartussaq suliarineqalerpat atorneqarnissaa naatsorsuutaavoq, taamaalilluni akileraaruseriffik paasissutissiisussaatitaasut ataasiakkaat ataatsimoortulluunniit, pissutissaqartillugu aammalu paasissutissat akileraarutissanik misissuinermi pisariaqavitsinnagit paasissutissiisussaatitaanermik nalinginnaasumik tunniussisussaatitsinnginnissaq qasukkaanissarluunniit pillugit aalajangiinissamut piginnaatinneqarluni. Soorlu aningaasat nalunaarutigisassat minnerpaaffissaannik angissusiliinissaq imaluunniit sulisitsisut ilaat ilaassapput, soorlu aalajangersimasumik amerlassusilinnik sulisoqartut paasissutissiisussaatitaanerat annikilliliiffigalugu.

Imm. 3-mut

Inatsimmi § 33-p naggataa imm. 3-mi ingerlatiinnarneqarpoq. Periutsimik suleriaatsimilluunniit allannguinissaq siunertaanngilaq.

Imm. 4-mut

§ 33, imm. 4-mut siunnersuut nutaajuvoq. Matumani paasissutissiisussaatitaasut inatsimmi kapitali 6-imni ilaatinneqartut aamma inatsisinik piareersaanermi, naatsorsueqqissaarnermi ilisimatusarnermilluunniit siunertalinnut atugassatut paasissutissiinissamik aamma peqquneqarsinnaanerat pillugu maleruagassiorsinnaanermik Naalakkersuisut piginnaatinneqarput, naak paasissutissat toqqaannartumik akileraartarnermi pissutsinut attuumanngikkaluartut. Aalajangersagaq ingammik nalunaaruteqartussaatitaasut, inatsimmi § 30-mut, tassa sulisitsisunut aningaasarsianik A-nik tunniussisartut ilaatinneqareersunut.

Tassaasinnaapput paasissutissat akileraarusiinermi akileraarutissallu naatsorsorneranni atorneqartussaanngitsut, tassa imaappoq paasissutissat Kalaallit Nunaanni oqartussaasut allat inatsisissanik piareersaanermi, ilisimatusarnermi naatsorsueqqissaarnissamilu taamaallaat atugas-saattut ingerlateqqitassatut akileraaruseriffiup pissarsiariniartagai. Paasissutissat inatsisinik piareersaanissaq, ilisimatusarneq naatsorsueqqissaarnissarlu pillugit misissuinermi atugassatut nalunaarutigineqartut ingerlateqqinnejartullu siunertanut allanut kingusinnerusukkut atorneqassangillat. Tassa imaappoq paasissutissat kingusinnerusukkut akileraaruseriffiup inuit aalajangersimasut pillugit suliassanik suliaqarmermini atussanngilai.

Paasissutissat aalajangersakkami nutaami pineqartussat assersuutigalugu atorfiup suunera aamma nal.ak. akissarsissutigineqartut tassaassangatinneqarput.

Nal.ak. akissarsissutigineqartut tassaapput nal.ak. sulisitsisup akissarsisitsissutai, tassaasut akissarsiat aningaasarsiat A-tut il.il. nalunaarutigineqartussat. Nal.ak. akissarsissutigineqartut ilaatigut tassaapput nammineerluni sulinikkut akissarsiat tunniunneqartut. Ilaatigullu tassaapput nal.ak. sulisup akissarsissutigisai, sulisoq suliaqanngikkaluartorluunniit. Soorlu tassaasinnaavoq piffissaq sulinngiffeqarfissaq, piffissaq suliunnaarfik sulisup soraarsitaaffia, imaluunniit piffissaq ernisimalluni, napparsimalluni sulinngiffik imaluunniit ulloq qitornap napparsimaffia siulleq.

Paasissutissat taamaattut Naatsorsueqqissaartarfiup siunissami atorsinnaavai akissarsianik naatsorsueqqissaarnermi, ilaatigut arnat angutillu akissarsiatigut assigiinngissutaannik ersersitsiniarnermi atugassatut.

Paasissutissat taakku sulisitsisup inatsimmi § 32 naapertorlugu ilisimatitsissutigisassaatut ilanngutissallugit pisariaqarpasinngilaq. Nalunaarsorneqartup akuersiseqqarnissaa allaluunniit akuersinissaat piumasaqaataanngilaq.

Imm. 5-imut

§ 33, imm. 5-imi maleruagassatut siunnersuut nutaajuvvoq § 33, imm. 4-milu maleruagassatut siunnersuutaasumut attuumassuteqarluni.

Siunnersuutaavoq paasissutissat pineqartut qinnutigineqarnerisigut akileraaruseriffiup Kalaalit Nunaanni oqartussaasunut allanut, matumani aamma Naatsorsueqqissaartarfimmuit ingerlateqqissinnaassagai, taakku naatsorsueqqissaarnissaminni ilisimatusarnissaminnillu atugassaattut.

Nr. 6-imut aamma nr. 7-imut

Inatsimmi § 33 c, imm. 3, aamma § 33 d, imm. 2, atorunnaarput.

§ 33, imm. 2-mik erseqqissaanerup kingunerisaanik allannguinerupput.

Nr. 8-mut, nr. 9-mut aamma nr. 10-mut

Inatsimmi § 33 e, imm. 3, § 33 f, imm. 2 aamma § 33 g, imm. 3 atorunnaarput.

§ 33, imm. 1-imik erseqqissaanerup kingunerisaanik allannguinerupput.

Nr. 11-mut, nr. 13-imut aamma nr. 14-imut

Inatsimmi § 36, imm. 2, § 37, imm. 2 aamma § 39, imm. 3 atorunnaarput.

§ 33, imm. 1-imik erseqqissaanerup kingunerisaanik allannguinerupput.

Nr. 12-mut

Matumani § 36, imm. 2-p atorunnaarsinneqarnerata kinguneranik allannguineq pineqarpoq.

Nr. 15-imut aamma nr. 16-imut

§ 40, imm. 5-ip aamma imm. 7-ip oqaasertai nutajupput, Aningaasarsianit akileraarutit pil-lugit Inatsisartut inatsisaata allannguutissaatut siunnersuutigineqartut kingunerisaannik. Kii-salu inatsisinut innersuussinerit ilanngunneqarput.

Siunnersuutaavoq aalajangersagaq (imm. 5) ilallugu ilanngunneqassasoq ingerlatseqatigiiffit Erngup nukingata nukissiorermut atorneqartarnera pillugu Inatsisartut inatsisaat naapertorlugu akuersisummik pigisaqartut aningaasarsianit akileraarutaat iluanaarutisianillu akileraarutaat pineqartunut ilaassasut. Taamaattumik ingerlatseqatigiiffinnit, inatsit siuliani taaneqartoq naapertorlugu akuersisummik pigisaqartunit akileraarutitigut isertitat, ingerlatseqatigiiffit Aatsitassat pillugit ingerlatallu tamatumunnga pingaarutilit pillugit Inatsisartut inatsisaat naapertorlugu akuersisummik pigisaqartut akileraarutaasa pineqarnerattulli agguataarneqassapput. Siunnersuutaavortaaq ingerlatseqatigiiffit Aningaasarsianit akileraarutit pillugit Inatsisartut inatsissaanni kapitali 3 b-mi pineqartut aningaasarsianit akileraarutaat iluanaarutisianillu akileraarutaat aammattaaq Nunatta karsiata pisassarissagai. Aningaasarsianit akileraarutit pillugit Inatsisartut inatsissaanni kapitali 3 b-mi pineqarput ingerlatseqatigiiffit iluanaarutisiassatut agguassaminnik ilanngaateqarsinnaanngitsut. Tassani eqqarsaatigineqarpoq kapitali 3 b-mi pineqarmata ingerlatseqatigiiffit aatsitassarsiorermik erngullu nukinganik atuinermik ingerlataqartut, isertitaallu Nunatta karsianit pisassarineqartut. Taamaalilluni qulakkeerneqarpoq isertitassat assigjiaartumik agguataarneqartarnissaat.

Aalajangersakkat malillugit ilaatigut aatsitassarsiorermi ingerlatseqatigiiffit ingerlatseqatigiiffit akileraarutaanut iserititat Nunatta Karsianut nakkartinneqartarput. Taamaattoq Kalaallit Nunaanni Aatsitassanut Aningaasaateqarfik pillugu malittarisassat malillugit isertitat taakku aatsitassanut aningaasaateqarfimmut nakkartinneqartarput.

Siunnersuutaavoq ernianit akileraarutitut siunnersuut (imm. 7), ingerlatseqatigiiffit akileraarutaattulli Nunatta karsiata, kommunip akileraarfiusup kommunillu pisassarissagaat.

Nr. 17-imut

§ 44 a-tut siunnersuut nutajujuvoq. Aalajangersagaq Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsissaattut siunnersuutip (UKA 2023/18) matuma ilutigisaanik saqqummiunneqartup kinguneraa, tassani naatsorsuutigineqarluni iluanaarutisianit akileraarutinik utertitsarnissami suliassat amerlisinnaanerat aammalu aningaasat uninngatinneqartut tunniunneqartut amerlisinnaanerat.

Aalajangersagaq akileraaruseriffiup iluanaarutisianit akileraarutinik, ernianik imaluunniit royltynik utertitsivigineqarnissamik piumasarineqartunik, marloriaammik akileraannginnissaq pillugu isumaqatigiissut tunngavigalugu utertinneqartussanik tunniussinissamut sivisunerusumik piffissaqarnissaanik atuutilersitsissaaq. Siunnersuut malillugu utertitsineq kingusinnerpaamik akileraaruseriffiup qinnuteqaammik tigusaqarneraniit kingusinnerpaamik qaammatit arfinillit qaangutinnginneranni pisassaaq.

Piumasarineqartut piffissaliussap iluani tunniunneqanngippata pissarsisussamut, erniap § 44, imm. 4 naapertorlugu naatsorsorneqartup amerlaqataanik ernialiisoqassaaq.

Aalajangersakkap imm. 2-aní allaqqavoq akileraaruseriffik utertitsivigineqarnissamik qinnuteqaammik misissuisinnaanngippat imm. 1 naapertorlugu piffissaliussaq unitsinnejqassasoq. Tamannali taamaallaat atuutissaaq tamanna tunineqartussamut tunngasunik pissuteqarpat, matumani aamma uppernarsaatit saqqummiunneqartut naammanngippata, assersuutigalugu qinnuteqartup iluanaarutisianik tunniunneqartunik ilumut piginnittuiuppat qinnuteqartullu iluanaarutisianik tigusaqarsimanera uppernarsarneqanngippat imaluunniit aningaasanut tunngasut erseqqinngippata paasiuminaappataluunniit.

Aalajangersakkap imm. 3-aní allaqqavoq akileraaruseriffik qularnaveeqquuseeqqusisinnaasoq, aningaasanik tunniussinissaq annasaqarsinnaanermik nassataqassangatinneqaraangat. Tassanili piumasaqataavoq suliap isumaqatigiinngissutaalluni Akileraarusiinermilu Aalajangiisartunit eqqartuussivinnilluunniit suliarineqarnera.

Nr. 18-imut

§ 45 a-tut siunnersuut nutaajuvoq. Aalajangersakkap akileraaruseriffik pisassarisaat ernianik naatsorsuiffiusumi erniaasa 100 kr.-nik minnerusumilluunniit amerlassuseqarneranni ernialersuinnginnissamik perarfissaqarneranik imaqrpoq.

Maleruagassaq pisassarisanut ataasiakkaanut atuuppoq, kisianni akileraarutinut akiitsut ataasiakkaat piffissani ernianik naatsorsuiffiusuni ataasiakkaani erniai tamarmiusut annerpaamik 100 kr.-ussapput.

Taamattaaq § 45 b-p nutaamik oqaasertalerneqarnera aamma nutaajuvoq. Aalajangersakkami ilanngunneqarput akileraaruseriffiup ernialersuinermik unitsitsisinnaanera aamma isumakkeerisinnaanera. Maleruagassatut siunnersuutaavoq akileraaruseriffik akileraartartumut ernialunneqartunik taakkulu tunngaviinik naliliisassasoq. Matumani piumasaqataavoq akileraartartup paassisutissat pisariaqartinneqartut tamaasa piffissaagallartillugu nassiuutissagai aammalu akileraaruseriffik paassisutissanik amerlanerusunik nassiusseqqusilluni qinnuiginnippat tamatuminnga malinnissimanissa.

Maleruagassap ilaatigut killilerujussuarmik atorneqartussaagunarpoq, aatsaallu akileraaruseriffiup kukkunera nalorninaatsumik paasineqarpat atorneqartussatut naatsorsuussaalluni.

Taamattaaq maleruagassaq atuuttassaaq ernialiunneqartut siusinnerusukkut missingersuilluni amerlassusilikamut, kingusinnerusukkulli appartinneqartumut tunngasuugaangata, aammalu missingersuilluni angissusiliineq naammanngitsunik tunngaveqarluni pisimatillugu. Tassa imaappoq pisassarisat (akileraarutinut akiitsut) pinngorsimassapput missingersuilluni amerlassusiliinerup, kingusinnerusukkulli akileraaruseriffimmit imaluunniit Akileraarusiinernik aalajangiisartunit appatinneqartup kingunerisaanik, kiisalu ukiumi aningaasarsiorfiusumi pineqartumi missingersuilluni qaffaaneq ukiuni siusinnerusuni aningaasarsianit qaffasinnerungaatsiarpat, suliamut tunngatillugu maannamut paasissutissaatigineqartut tunngavigalugit.

Maleruagassaq aammattaaq atuutissaaq suliaq piffissami siusinnerusumi akileraaruseriffiup aalajangiiffigisimappagu piffissami tassanerpiaq ernialersuisoqarnissaa pisimassanganikkaluartoq takuneqarsinnaappat, kiisalu suliap suliarineqarnerata sivisussusia akileraartartumut tunngasunik pissuteqanngippat, matumani aamma paasissutissanik akileraarusiinermi atugassanik nassiussinngitsoortoqarpat.

Taamattaaq maleruagassaq atuutissaaq ernialersuutigineqartut piffissamut akileraartartup, suliap akileraaruseriffimmit suliareqqinneqarnissaanik qinnuigininnerata kingornanut tunngappata, taavalu akileraarutissanik angissusiliineq taassuma kingorna appatinneqarpat, akileraarutissanik angissusiliineq siulleq akileraartarnermut ingerlatsiviup ilisimasariaqagarluanik erseqqissumik kukkunerit pissutigalugit, soorlu sulisitsisup annertuumik kukkusumik nalunaaruteqarnera imaluunniit ilanngaatissat nammineerluni nalunaarsuiffimmi ilanngaatiginngitsoorneqarneri pissutigalugit. Taamaattoqartillugu piumasaqaataavoq akileraartartup suliamik suliareqqiinissaq piffissaagallartillugu qinnutigissaga tassungalu upternarsaatnik naammattunik nassiussinissaa, taamaallunni piffissaq suliap suliarineqarfia akileraaruseriffiup kisimi pisuussutigissallugu.

Ernialersuinermik unitsitsinissamik aalajangerneq akiitsullip takussutissiineranik tunngaveqarsinnaavoq imaluunniit akileraaruseriffiup nammineq sulissuteqarnermigut naliliineranik tunngaveqarsinnaalluni.

Akileraaruseriffiup akileraarutinut akiitsunik ernialersuineq nangeqqissinnaavaa paasissutissat nutaat, akileraaruseriffiup ernialersuinermik unitsitsinissaq aalajangiunneqarmat paasissutis-saatiginngisai pigineqalerpata. Matumani aamma akileraartartup akileraarutissaanik angissusiliineq pillugu aalajangiineq nutaaq paasissutissat naammattut tunngavigalugit pippat.

Aalajangersagaq §§ 53-55-imut maleruagassanut isumakkeerisarnermut tunngasunut attuumassuteqanngilaq, tamannalu ilaatigut pissutaavoq akileraaruseriffiup ernialersuinermik unitsitsinissaq ernialersuinnginnissarlunniit pillugit aalajangiineri akileraarutinik, ernianik il.il. isumakkeerinissaq pillugu suliaqartoqassagaluarpat aalajangiisuunaviangimmata.

Nr. 19-imut

§ 47 a siunnersuutigineqartoq nutaaajuvoq. Aalajangersakkut akileraartarnermut ingerlatsiviup aningaasarsianit akileraarutit pillugit Inatsisartut inatsisaanni § 30, imm. 1, uniffiit pingajuat naapertorlugu, amigartoorutit kinguartinnerisa sivitsorneqarnissaannut periarfissakkut, annertussusiliinermik suliarinneqqinnissamut periarfissaata sivitsornissaa qulakkeerneqassaaq.

Aningaasarsianit akileraarutit pillugit Inatsisartut inatsisaanni maleruagassat malillugit, akileraartussaatitaasut amigartoorutinik (amigartoorutit akileraaruserneqartussaatitaasutut isertitanik) ukiut isertitaqarfiiit tullit tallimani kinguartitsisinnaapput. Aningaasarsianit akileraarutit pillugit inatsisisartut inatsisaannut UPA2023-mi allannguutissatut siunnersuutikkut, akileraarusiisarnermi amigartoorutit atorneqarnissaannut killiliussap ukiunut qulinut sivitsorneqarnissaa siunnersuutigineqarpoq.

Taamaammat piffissaliussani akileraartartup amigartoorutinik kinguartitsisinnaanerani, piffissamilu akileraartarnermut ingerlatsiviup nalinginnaasumik akileraarusiussassatut aalajangiinermik suliarinneqqissinnaanerani nikingasoqarsinnaavoq. Malittarisassat atuuttu naapertorlugit akileraartarnermut ingerlatsiviup, immikkut ittumik annertussusiliinissamut tunngavissat naammassineqartillugit, taamaallaat ukiut amigartoorfiusut tallimat sinnerlugit sioqqutsisut suliareqqissinnaavai.

Taamaammat immikkut ittumik suliamik suliarinneqqinnissamut killiliussap, ukiut isertitaqarfiusut tallimat qaangerlugit amigartoorutinik ukiumut isertitaqarfimmuit kinguartitsinikkut atorneqartut kingorna ukiunut marlunnut kinguartinneqarnissaa siunnersuutigineqarpoq. Taamaalilluni § 47, imm. 1 aamma imm. 4 kiisalu ukioq isertitaqarfiusup amigartoorutip pilerfigisaa sanioqqunneqarpoq, suliarlu ukiut isertitaqarfiusut tulliuttut tallimat qaangerneranni suliareqqinnejqarsinnaavoq.

Malittarisassat atuuttu naapertorlugit akileraartarnermut ingerlatsivik ukiup isertitaqarfiusumit ukiut tallimat qaangiunneranni 31. oktober tikillugu nalinginnaasumik suliamik suliarinneqqissinnaavoq, tak. § 47. § 47 a-mi aalajangersagaq nutaaq akileraartarnermut ingerlatsiviup ukiut isertitaqarfiusuni qaangiuttuni, tassa ukiut isertitaqarfiusut tallimaanni kingusinnerusukkullu, amigartoorutip atorneqarnerani ukiut isertitaqarfiusut marluk kingorna 31. december tikillugu nalinginnaasumik suliamik suliarinneqqissinnaavoq.

Aalajangersakkat nutaat aalajangersaanernut amigartoorutip annertussusaanut sunniuteqartunut taamaallaat atuupput. § 47 a-p atorneqarnerani aningaasarsianit akileraarutit pillugit Inatsisartut inatsisaanni § 30, imm. 1 uniffiit pingajuat malillugu amigartoorutit kinguartinneqartut aatsaat pineqarnerat tunngavissaatinneqarpoq. Tassani amigartoorutit ukiumi isertitaqarfiusumi ulloq 1. januar 2018 kingorna aallartittumi pilersut pineqarput.

	Ukioq isertitaqarfik amigartooru- teqarfiusoq	Amigartoorut kr.-nngorlugu	Ukioq isertitaqarfik amigartoorutip kinguartin- neqarfia	Amigartoorut kinguartinneqartoq kr.-nngorlugu.	Akileraartarnermut ingerlatsiviup ukioq isertitaqarfimmi 2018-imi suliaq ulloq taaneqartoq tikillugu suliareqqissin- naavaa
Asser- suut 1	2018	500.000	2028	500.000	31.12.2030
Asser- suut 2	2018	500.000	2022	250.000	31.10.2023
	2018	500.000	2023	250.000	31.12.2025
Asser- suut 3	2018	500.000	2023	250.000	31.12.2025
	2018	500.000	2024	250.000	31.12.2026

Assersuut 1: Amigartoorut ukioq isertitaqarfik 2018-imi pilersimappat, tamanna annertunerpaamik atuinermi ukiut isertitaqarfiusut tulliuttut qulini amigartoorutinik kinguartitsinermut atorneqarsinnaavoq, tassa ukioq isertitaqarfiusoq 2028-mut, tamatumani ukiuni isertitaqarfiusumi atuuffinni naammattumik annertussusilimmik akileraarusigassatut isertitanik sinneqartoortoqartinnagu. Taamatut pisoqartillugu akileraartarnermut ingerlatsivik § 47 a malillugu ukioq isertitaqarfik 2018-imi ulloq 31. december 2030 tikillugu nalinginnaasumik suliamik suliardinneqqissinnaavoq.

Assersuut 2: Amigartoorut ukioq isertitaqarfik 2018-imi pilersoq, ilaannatortumik 2022-mut 2023-mullu kinguartinneqassaaq. Taamatut pisoqarnerani akileraartarnermut ingerlatsiviup maanna § 47-mi aalajangersagaq atuuttoq malillugu, ukioq isertitaqarfiusoq 2018 31. oktober 2023-p tungaanut suliareqqissinnaavaa. Tamatuma saniatigut ukioq isertitaqarfiusoq 2018 pillugu suliat, amigartoorutilu 2023-mut kinguartinneqartup ilaata ulloq 31. december 2025 tikillugu suliareqqinnissaanut akileraartarnermut ingerlatsivik periarfissaqarpoq.

Assersuut 3: amigartoorut ukioq isertitaqarfik 2018-imi pilersoq ilaannakortumik 2023-mut 2024-mullu kinguartinneqassaaq. Taamatut pisoqartillugu akileraartarnermut ingerlatsiviup § 47 a-tut aalajangersagassatut siunnersuutigineqartoq nutaaq malillugu, ukioq isertitaqarfik 2018-imi suliaq ulloq 31. december 2025 kiisalu ulloq 31. december 2026 tikillugit

suliareqqissinnaavai, amigartoorutillu ilai 2023-mut 2024-mullu kinguartinneqartut nalimmassaarlugit.

Nr. 20-imut

§ 59, imm. 2-p oqaasertaasa erseqqissarneqarnissaat siunnersuutaavoq, tassa paasissutissat suut akileraaruseriffiup nalunaaruteqartussaatitaasumut qinnutigisinnaanerai.

Nalunaaruteqartussaatitaasup akileraaruseriffiup qinnuiginninneratigut atortut paasissutissanut nalunaarutigineqartussanut tunngaviusut nassiuutissavai. Aalajangersakkap oqaasertai ima erseqqissarneqarput oqaasertaani toqqaaannartumik allaqqalerluni, paasissutissat pineqartut aamma tassaammata paasissutissat nalunaarutigineqartussat aalajangersimasut nassiuunneqarnissaannik naliliinissami atugassat.

Erseqqissaaneq OECD-p Kalaallit Nunaata akileraartarnermut inatsisaanik, CRS-imik (Common Reporting Standard) maleruagassanik atuilerneq atuutsitsinerlu eqqarsaatigalugit nalilersuisimaneranik tunngaveqarpoq. OECD-p sulinermini tassani paasivaa Kalaallit Nunaata inatsisai nunallu assigiinngitsut periusii, Global Forum, OECD-mit aalajangersagaasut imminnut naapertuutinngitsortaqalaartut.

CRS-ip siunertaraa nunarsuarmi sumiikkaluaraanniluunniit akileraarutinik akiliisarnissap qu-lakkeernissaa aamma nunat akornani akileraarnaveersaarluni iliuuserineqartartunik akiuniarnissaq. Tamanna pingaarnertut nunat tamarmik iluminni nalunaaruteqartussaaneq pillugu maleruagassaqarnerisigut, nunat akileraartarnermut oqartussaasuisa akornanni paasissutissanik nalunaarutigineqartunik paarlataeqatigiittarnerannut iluaqutaasunik qułakkeerneqarpoq.

Aningaaseriviit, inuunermut sillimmasiisarfíit allallu aningaasaqarnermik ingerlatsiviit aningaasaatinut kontot toqqorsiviillu inunnit suliffeqarfinnillu nunanit allaneersunit pigineqartut CRS-imut nalunaarutigisussaavai.

Nr. 21-mut

§ 68 a-tut siunnersutigineqartoq nutaajuvoq. Akit nammineq aalajangersarlugit nuussinernut uppernarsaatnik suliaqartoqanngippat akileraaruseriffiup missingersuilluni angissusiliisinnaaneranik erseqqissaanissaq siunnersuutaavoq. Uppernarsaatit allaganngorlugit suliat nammineerluni nalunaarsuiffiusumi naammattumik suliaassapput, taamaammallu uppernarsaatit kingusinnerusukkut suliarineqarnerat naammanngilaq.

Uppernarsaatit Aningaasarsianit akileraarutit pillugit Inatsisartut inatsisaanni § 36 b, imm. 2-mi maleruagassat naapertorlugit suliaatillugu tunniunneqarpata piffissaagallartillugu suliaasutut aatsaat isigineqassapput. Ukioq aningaasarsiorfimmut tunngatillugu uppernarsaatit ullormi nammineerluni nalunaarsuiffimmik tunniussiffiusumi piariissapput. Akileraartartulli

upfernarsaatissanik qinnuigineqarnerminnik tigusinermennit, upfernarsaatinik nassiuissinissamut ullunik 60-inik piffissaqarput. Akileraartartut aammattaaq § 36 b, imm. 2 naapertorlugu nalunaarut atuutilertoq aqqutigalugu pisussaaffilerneqarsinnaapput, qinnuigineqanngikkaluarlutik nammineerluni nalunaarsuiffimmik tunniussivissap qaangiunneranit kingusinnerpaamik ulla 60-it qaangiunneranni upfernarsaatinik tunniusseqqullugit.

Uppernarsaatit piffissaagallartillugu suliarineqanngippata akileraaruseriffik, akit nammineq aalajangersarlugit nuussinernik missingersuilluni angissusiliinissamut piginnaatitaavoq. Taamaammat aningaasarsianik akileraartussanik angissusiliineq, akit nammineq aalajangersarlugit nuussinerit attuumassuteqannginnissamik periutsit tunngavigalugit niuernermi nuussinnertut naatsorsorlугit pisinnaavoq, tak, Aningaasarsianit akileraarutit pillugit Inatsisartut inatsisaanni § 36 a.

Aalajangersakkap imm. 2-ani naatsorsuutinut atortunik § 58, imm. 1 naapertorlugu qinnuiginnitoqaraluartoq nassiuissisoqanngippat missingersuilluni angissusiliinissaq atuutissasoq aamma aalajangersarneqarpoq.

Imm. 3-mi aalajangersakkami siunnersuutaavoq akileraartartut isertitakinnerusut akit nammineq aalajangersarlugit nuussinerit § 39, imm. 4, nr. 1-3-mi pineqartut kisiisa pillugit upfernarsaasiortussat pineqaraluarpataluunniit aalajangersagaq aamma atuutissasoq. Taakku soorlu tassaasinnaapput illuatungeriit, nunani Kalaallit Nunaata marloriaammik akileraannginnissaq pillugu isumaqtigiissuteqarfiginngisaaniittut akit nammineq aalajangersarlugit nuussineri.

§ 2-mut

Inatsisartut inatsisaat ulloq 1. januar 2024 atuutilissasoq siunnersuutaavoq.

Siunnersuut inatsimmut atuuttumut sanilliullugu	
<i>Oqaasertaa atuuttoq</i>	<i>Siunnersuut</i>
	<p style="text-align: center;">§ 1</p> <p>Akileraaruserinermik ingerlatsineq pillugu Inatsisartut inatsisaanni nr. 11, 2. november 2006-imeersumi, tak. Namminersorlutik Oqartussat nalunaarutaat nr. 11, 3. november 2021-meersoq, Inatsisartut inatsisaatigut nr. 12, 1. december 2021-mi allanngortinneqartumi aamma Inatsisartut inatsisaat nr. 20, 21. november 2022- meersukkut kingullermik allanngortinneqartumi makku allanngutitinneqarpuit:</p>
	<p>1. § 10-p kingorna ilanngunneqarpoq:</p> <p style="text-align: center;">"Immikkoortoq 1 a</p> <p style="text-align: center;"><i>Nunat assigiinngitsut kattuffii</i></p> <p style="text-align: center;">Kapitali 3 a</p> <p style="text-align: center;"><i>Nunat assigiinngitsut kattuffiisa akiliisinneqannginnissaat</i></p> <p>§ 10 a. Naalakkersuisut isumaqtigiissuteqarnermikkut nunani assigiinngitsuni kattuffiit suliffeqarfiiulluunniit akileraarutinik akitsuutinillu pisussaaffinnillu allanik, akileraartarnermut akitsuusiisarnermullu inatsisini allaqqasunik oqilisaanneqarnissaat akiliisinneqannginnissaalluunniit akuerisinnaavaat, tamanna kattuffiup suliffeqarfiiulluunniit siunertaata naammassinissaanut suliassaatalu isumannaarnissaanut pisariaqarpat.</p> <p style="text-align: center;"><i>Imm. 2. Taamaaqataanik pisinnaatitaaffeqartussatut</i></p>

	<p>akiliisinneqanngitsussatullu akuerneqarsinnaapput:</p> <ol style="list-style-type: none"> 1) Kattuffinni suliffeqarfinnilu imm. 1-im taaneqartuni aallartitatut atorfeqartut taakkulu ilaquataat. 2) Paasisimasallit kattuffinni suliffeqarfinniluunniit imm. 1-im taaneqartuni suliassanik suliaqartut. 3) Inuit saqitsaassutit suliarineqarneranni, kattuffiit suliffeqarfiillu imm. 1-im taaneqartut sinnerlugin peqataasut. <p><i>Imm. 3. Naalakkersuisut isumaqatigiissutit manna aalajangersakkami taaneqartut naammassineqarnissai pillugit iliuusissat erseqqinnerusut aalajangerneqarnissaannut piginnaatinneqarput.”</i></p>
§ 30 a. <i>Imm. 2. § 30-mi, imm. 1, nr. 5 aamma 6-im, kiisalu imm. 2-5-im aalajangersakk nut aamma atuutissaaq.</i>	<p>2. § 30 a, imm. 2, ima oqaasertaqarpoq: ” <i>Imm. 2. § 30, imm. 1, nr. 4-mi 5-imilu aamma imm. 2-mit 5-imut aalajangersakkat taamatulli atuupput.”</i></p>
§ 31. Tigusisartoq § 30-mi taaneqartunik isertitaqartartoq Kalaallit Nunaanni akile- raartussaatitaajunnaarpat, paasissutissiisus- saatitaasoq qinnuigineqarnini malillugu paasissutissiisaaq § 30-mi ukiup aallartin- neraniit akileraartussaatitaanerup atorun- naarnerata tungaanut pineqartup aningaa- sarsiaanik kiisalu akileraarutit A-t unerar- tit annertussusaannik.	<p>3. § 31, imm. 1, ima oqaasertaqarpoq: ” <i>Aningaasarsianik § 30-mi taaneqartunik pisartoq Kalaallit Nunaanni akileraartussaajunnaarpat, paasissutissiisussaatitap qinnuigineqarnini malillugu § 30-mi § 30 a-milu taaneqartutut paasissutissiisutigissavai:</i></p> <ol style="list-style-type: none"> 1) Pineqartup qaammatisiutit malillugit ukiup aallartinneraniit piffissap akileraartussaajunnaarfimmi tungaanut aningaasarsiai, 2) soraarnerussutisiaqarnissamut inuunermulluunniit sillimmasiinermik aaqqissuussinermut akiligai kiisalu 3) akileraarutit A-t uninngatinneqartut amerlassusii.”
§ 32. § 30 aamma § 31, imm. 1 malillugu atingaasarsiaqartoq pillugu paasissutissat assilineranik aningaasarsiaqartoq tunine- qassaaq.	<p>4. § 32 ima oqaasertaqarpoq: ” § 32. Paasissutissat aningaasarsianik pis- sarsisumut tunngasut § 30, § 30 a aamma § 31, imm. 1 naapertorlugit paasissutissiisuti- gineqartut assilineqarneri aningaasarsianik pissarsisup pissavai.”</p>

<p>§ 33. §§ 30-32 malillugit paasissutissiis-sutaasussat pillugit malittarisassanik Naalakkersuisut aalajangersaasinnaapput, taassumalu ataani paasissutissanik tunni-ussisussaatitaasut immikkoortuinut paa-sissutissiisutaasussanut piumasaqaatit oqilisinnissaannut. Naalakkersuisut aamma malittarisassanik aalajangersaasinnaapput, taassuma kingorna tigusisumut isertitat A-junngitsut eqqarsaatigalugit § 30, malillugu immikkut paasissutissiisoqarsinnaangor-lugu. Akiliutigineqartut piffissap aningaa-sarsiorfiusup naareernerani akilerneqartut ukiumi sorlermi nalunaarutigineqarnissaat pillugu Naalakkersuisut malittarisassanik aalajangersaasinnaapput.</p>	<p>5. § 33 ima oqaasertaqarpoq:</p> <p>” § 33. Naalakkersuisut paasissutissat §§ 30-32-mut, §§ 33 a-33 g-mut aamma §§ 35-39-mut naapertorlugit tunniunneqarnissaat, matumanilanganngullugit qanoq akuttutigisumik tunniunneqartarnissaat aamma ilisimatisisussaatitaaneq pillugit maleruagassanik aalajangersaasinnaapput.</p> <p><i>Imm. 2.</i> Naalakkersuisut nalunaaruteqartussaatitaasut imm. 1 naapertorlugu nalunaaruteqarnissaannut piumasaqaatit qasukkarneqarnissaat pillugu maleruagassanik aalajangersaasinnaapput.</p> <p><i>Imm. 3.</i> Naalakkersuisut aningaasarsiat pissarsisup aningaasarsiaatut A-tut isigineqanngitsut pillugit paasissutissat § 30 naapertorlugu immikkoortillugit tunniunneqarnissaat pillugu maleruagassanik aalajangersaasinnaapput. Naalakkersuisut tunniunneqartut piffissaq pisassanngorfiat qaangiutereersoq tunniunneqartut pillugit paasissutissat ukiumi sorlermi nalunaarutigineqarnissaat pillugu maleruagassanik aalajangersaasinnaapput.</p> <p><i>Imm. 4.</i> Naalakkersuisut kapitali una naapertorlugu inatsisinik piareersaanermi, naatsorsueqqissaarnermi ilisimatusarnermiluunniit atorneqartussanik nalunaarutiginnittussaatitaasut akileraaruseriffimmut paasissutissanik amerlanerusunik nassiusisarnissaat pillugu maleruagassanik aalajangersaasinnaapput.</p> <p><i>Imm. 5.</i> Paasissutissat imm. 4 naapertorlugu nalunaarutigineqartut akileraaruseriffiup qinnuigineqarnermigut Nunatsinni oqartussaasunut allanut, inatsisinik piareersaanermi, naatsorsueqqissaarnermi ilisimatusarnermiluunniit atorneqartussatut ingerlateqqissinnaavai.”</p>
<p>§ 33 c.</p> <p><i>Imm. 3.</i> Naalakkersuisut malittarisassanik aalajangersaasinnaapput, imm. 1-imi sulinermi peqatigiiffiit taaneqartut</p>	<p>6. § 33 c, imm. 3, atorunnaarpoq.</p>

nalunaaruteqarneq pillugu ilaasortaminut ilisimatitsinissamut pisussaaffeqartut.	
§ 33 d. <i>Imm. 2.</i> Naalakkersuisut malittarisassanik aalajangersaasinnaapput Kalaallit Nunaanni Namminersorlutik Oqartussat nalunaaruteqarneq pillugu ilinniagaqartumut ilisimatitsinissamut pisussaaffeqarnerat pillugu.	7. § 33 d, imm. 2, atorunnaarpoq.
§ 33 e. <i>Imm. 3.</i> Naalakkersuisut imm. 1 aamma 2 malillugit paasissutissanik tunniussisarneq pillugu maleruagassanik erseqqinnerusunik aalajangersaasinnaapput.	8. § 33 e, imm. 3, atorunnaarpoq.
§ 33 f. <i>Imm. 2.</i> Naalakkersuisut imm. 1 malillugu paasissutissanik tunniussisarneq pillugu maleruagassanik erseqqinnerusunik aalajangersaasinnaapput.	9. § 33 f, imm. 2, atorunnaarpoq.
§ 33 g. <i>Imm. 3.</i> Naalakkersuisut imm. 1 aamma 2 naapertorlugu paasissutissanik tunniussineq pillugu malittarisassanik sukumiinerusunik aalajangersaasinnaapput.	10. § 33 g, imm. 3, atorunnaarpoq.
§ 36. <i>Imm. 2.</i> Imm. 1 malillugu paasissutissiissutigineqartussat pillugit Naalakkersuisut annertunerusunik malittarisassiorsinnaapput.	11. § 36, imm. 2, atorunnaarpoq.
§ 37. § 36, imm. 1 malillugu kontomik pilersitsisoq kontomik piginnittup inuttut normua imaluunniit selskabip nalunaarsorneqarnerani normua paasissutissiissutigissavaa. § 36 malillugu paasissutissiisussaatitaasut kontomik piginnittup inuup normuanik imaluunniit nalunaarsorneqarnermi normumik akileraaruseriffiup paasisissinnaavai.	12. § 37, imm. 1 ima oqasertalerneqassaaq: ” § 36-mi taaneqartutut kontumik pilersitsisoq, kontumik piginnittup inuup normuanik ingerlatseqatigiiffiulluunniit nalunaarsorneqarnerani normuanik nalunaarutiginnissaaq. Akileraartarnermut ingerlatsivik § 36 naapertorlugu kontumik piginnittup inuup normuanik nalunaarsuinermiluunniit normuanik nalunaaruteqartussaatitaasumut nalunaarutiginnissinnaavoq.”

§ 37. <i>Imm. 2. Imm. 1 malillugu paasissutissiissutigineqartussat pillugit Naalakkersuisut malittarisassanik aalajangersaasinnaapput.</i>	13. § 37, imm. 2, atorunnaarpoq.
§ 39. <i>Imm. 3. Imm. 1 aamma 2 malillugu paasissutissiissutissanut malittarisassat Naalakkersuisut aalajangersarsinnaavaat.</i>	14. § 39, imm. 3, atorunnaarpoq.
§ 40. <i>Imm. 5. Selskabit suliffeqarfiillu, Kaalaallit Nunaanni atortussiassat aatsitassanit pisut il.il. inatsit, sermip erngullu avammut nioqqtissatut atorneqarnissaat pillugu inatsisartut inatsisaat naapertorlugit pisinnaatitaaffeqartut aningaasarsianit akileraarutaat, tamatumani ilaallutik iluanaarutisianit akileraarutit, landskarsip pisassarai. Aningaasarsianit iluanaarutisianillu akileraarutinut taamaattunut §§-it 27 aamma 43, naapertorlugit tapiliunneqartartut ernialiunneqartartullu taamatulli landskarsimit pisassarineqarlutillu akilerneqartassapput.</i>	15. § 40, imm. 5, ima oqaasertaqarpoq: ” <i>Imm. 5. Ingerlatseqatigiiffiit suliffeqarfiillu, Aatsitassat pillugit ingerlatallu tamatumunnga pingaarutillit pillugit Inatsisartut inatsisaat, Erngup nukingata nukissiornermut atorneqartarnera pillugu Inatsisartut inatsisaat aamma Sermip erngullu niuernikkut iluaqtigineqarnissaat pillugu Inatsisartut inatsisaat naapertorlugit akuersisummiq pigisaqartut aningaasarsianit akileraarutaat, matumani ilanngullugit iluanaarutisianit akileraarutaat Nunatta karsiata pisassarai. Tamanna ingerlatseqatigiiffiit, Aningaasarsianit akileraarutit pillugit Inatsisartut inatsisaanni kapitali 3 b-mi pineqartut iluanaarutisianit akileraarutaannut aamma aningaasarsianit akileraarutaannut aamma atuuppoq. Aningaasarsianit iluanaarutisianillu akileraarutinut taakkununnga § 27 aamma § 43 naapertorlugit tapiliussat erniallu taamatulli aamma Nunatta karsiata pisassaralugillu akiligassarai.”</i>
§ 40. <i>Imm. 7. Selskabit akileraarutaat landskarsip, kommunip akileraarfiusup kommunillu pisassaraat, taamaattorli tak. imm. 5 aamma 6, aningaasarsianit akileraarutit pillugit inatsimmi § 61 naapertorlugu ukumi aningaasarsiorfiusumi akileraarusiissutigineqarsimasup, aningaasarsianit akileraarutit pillugit inatsimmi § 62 naapertorlugu</i>	16. § 40, imm. 7, ima oqaasertaqarpoq: ” <i>Imm. 7. Ingerlatseqatigiiffiit akileraarutaat kiisalu ernianit akileraarutit ukumi aningaasarsiorfiusumi procentip akileraarusiissutip Aningaasarsianit akileraarutit pillugit Inatsisartut inatsisaanni § 61 naapertorlugu angissusilerneqartup, ukumi aningaasarsiorfiusumi procentip akileraarusiissutip Aningaasarsianit</i>

<p>ukiumi aningaasarsiorfiusumi 1. januarimi innuttaasut amerlassusiat malillugu akileraarusiissutigineqarsimasup, aammalu ani ngaasarsianit akileraarutit pillugit inatsimmi § 63 naapertorlugu ukiumi aningaasarsiorfiusumi akileraarusiissutigineqarsimasup assigiinngissutaat naapertorlugu.</p>	<p>akileraarutit pillugit Inatsisartut inatsisaanni § 62 naapertorlugu ullormi 1. januarimi innuttaasut amerlassusiannut naleqqiullugu angissusilerneqartup aamma ukiumi aningaasarsiorfiusumi procentip akileraarusiissutip Aningaasarsianit akileraarutit pillugit Inatsisartut inatsisaanni § 63 naapertorlugu angissusilerneqartup angissusii naapertorlugit Nunatta karsiata, kommunip akileraarfiusup kommunillu pisassaraat, taamaattorli tak. imm. 5 aamma 6.”</p>
	<p>17. § 44-p kingorna ilanngunneqarpoq: ” § 44 a. Aningaasarsianit akileraarutit pillugit Inatsisartut inatsisaanni § 2 naapertorlugu akileraartussaasoq iluanaarutisianik, atuisin-naanermut akiliutinik (royalty) ernianilluuniit, Aningaasarsianit akileraarutit pillugit Inatsisartut inatsisaanni kapitali 3 b, § 36 e imaluunniit §§ 88-92 malillugit, aammalu marloriaammik akileraarnissaq pinngitsoorniarlugu isumaqatigiissut naapertorlugu akileraarutissaviusunit amerlanerusunik akileraaruserneqartunik pissarsisimappat, aningaasat akileraaruseriffiup utertitsinissamik qinnuteqaammik tigusaqarnerata kingorna qaammatit arfinillit qaangiutsinnagit utertinneqassapput. Utertitsineq piffissap taassuma kingorna pippat, akileraartussaasup erniat § 44, imm. 4 naapertorlugu ernianut naapertuuttut pisassarai.</p> <p><i>Imm. 2.</i> Iluanaarutisianit akileraarutinik utertitsinissamut piumasaqaatinik naammas-sinnittoqarnera akileraaruseriffiup pissarisumut tunngasut pissutigalugit misissorsin-naanngippagu imm. 1 naapertorlugu tunnus-sinissamut piffissaliussaq kipitinneqassaaq, pissarisumut tunngasut misissuinissamut akornuserneqarunnaarnissaata tungaanut.</p>

	<i>Imm. 3. Paasissutissat pigineqartut tunngavigailugit tunniussinissap annaasaqaratarsinnanermik kinguneqarnissaakileraaruseriffiup nalilerpagu, akileraarutinik unerartitsinissamik piumasaqaat isumaqatigiinngissutigineqarpat sullu Akileraarusiinernik aalajangiisartunit eqqartuussivinnilluunniit inaarutaasumik aalajangiiffiqeqanngippat, tigusisussap qularnaveeqqusiinissaakileraaruseriffiup piumasarisinnaavaa.”</i>
	18. § 45-p kingorna ilanngunneqarput: ” § 45 a. Piffissami pineqartumi pisassarisat erniaat 100 kr.-uppata ikinneruppataluunniit akileraaruseriffik ernialersuinngissinnaavoq.
	§ 45 b. Akileraaruseriffiup pisassarisanik ernialersuineq unitsissinnaavaa kiisalu ernialunneqareertut tamakkiisumik ilaannakuusumilluunniit isumakkeersinnaallugit: 1) akileraaruseriffiup piffissami missingersuilluni angissusiliiffigisaani paasissutissat pigineqartut tunngavigineqarsimasut eqqunngitsuusorinarpata, 2) akileraaruseriffiup suliaq piffissaq naam-maginartumik sivisussusilik qaangiutsinnagu aalajangiiffiqeqanngippagu, naak akileraaruseriffiup paasissutissat uppernarsaatillu pisiaqartut tamaasa tigoreeraluarlugit.”
	19. § 47-p kingorna ilanngunneqarput:

	<p>” § 47 a. § 47-mi malittarisassat atuukkaluartut, taamaattoq akileraartarnermut ingerlatsivik inernerusumik missingiinerup amigartoorutip naatsorsorneqarneranut sunniuteqartillugu, aningaasarsianit akileraarusiisarneq pillugu Inatsisartut inatsisaanni § 30, imm. 1, uniffit pingajuat malillugu amigartoorutip atorneqarnerata kingorna ukiut isertitaqarfiusut aappaata naanissaa tikkilugu, isertitanit akileraarusiussap missingerneqarneranut ilimasaaruteqarlunilu allanngortitsisinnaavoq.”</p>
§ 59. <i>Imm. 2. Nalunaaruteqartussaatitaasup akileraaruseriffimmit qinnuigineqarnermigut atortut paasissutissanut nalunaarutigineqartussanut tunngaviusut nassiuressavai.</i>	<p>20. § 59, imm. 2, ima oqaasertaqarpoq: ” <i>Imm. 2. Nalunaarutiginnittussaatitaasup akileraaruseriffimmit qinnuigineqaruni atortussat paasissutissanut nalunaarutigineqartussanut tunngaviusut nassiuressavai, matumani aamma ilanngullugit paasissutissat suut nalunaarutigineqartussaanerinik aalajangiinissami atugassat.”</i></p>
	<p>” § 68 a. Akileraartussaasoq Aningaasarsianit akileraarutit pillugit Inatsisartut inatsisaanni § 36 b, imm. 1-imi, imaluunniit imm. 4-mi pineqartoq, akit nammineq aalajangersarlugit nuussinerit pillugit piffissaliussaq eqqorlugu uppernarsaatnik, Aningaasarsianit akileraarutit pillugit Inatsisartut inatsisaanni § 36 b, imm. 2 naapertorlugu suliaqanngippat, akileraaruseriffik nammineerluni nalunaarsuiffimmik tunniussinissamut piffissaliussap qaangiunnerani, akit nammineq aalajangersarlugit nuussinerit taakku, Aningaasarsianit akileraarutit pillugit Inatsisartut inatsisaanni § 36 a naapertorlugu ukiumut aningaasarsiorfiusumut tassunga tunngatillugu missingersuilluni angissusiliisinnaavoq. Uppernarsaatnik Aningaasarsianit akileraarutit pillugit Inatsisartut inatsisaanni § 36 b, imm. 2, imaluunniit maleduagassat malillugit</p>

	<p>atuutilersinneqartut naapertorlugit suliarineqarsimallutilu tunniunneqarpata piffissaagallartillugu suliarineqartutut taamaallaat isigineqarsinnaapput.</p> <p><i>Imm. 2.</i> Akileraartussaasup akileraaruseriffiup uppernarsaatinik, Aningaasarsianit akileraarutit pillugit Inatsisartut inatsisaanni § 36 b, imm. 2 naapertorlugu misissuineranut atatillugu naatsorsuutinut il.il. tunngasunik § 58, imm. 1 naapertorlugu nassisusseqquuneqarnini malinngippagu, imm. 1 missingersuilluni angissusiliinermut tunngasoq atuutissaq.</p> <p><i>Imm. 3.</i> Imm. 1 aammattaaq atuutissaq akilerartussaatitaasoq aningaasarsianit akileraarusiisarneq pillugu Inatsisartut inatsisaanni § 36 b, imm. 4 ilaatinneqartillugu.”</p>
	<p style="text-align: center;">§ 2</p> <p>Inatsisartut inatsisaat ulloq 1. januar 2024 atuutilissaq.</p>

Tusarniaaneq pillugu allakkiaq

Siunnersuut pillugu Sulisitsisunit, SISA-mit, Nunalerinermut, Imminut pilersornermut, Nukissiuuteqarnermut Avatangiisinullu Naalakkersuisoqarfimmit, Meeqganut, Inuuusuttunut Ilaqtariinnullu Naalakkersuisoqarfimmit, Ineqarnermut Attaveqaasersuutinullu Naalakkersuisoqarfimmit, Nunanut allanut, Inuuussutissarsiornermut Niuerermullu Naalakkersuisoqarfimmit, Aatsitassanut Inatsisillu atuutsinneqarnerannut Naalakkersuisoqarfimmit Kommune Kujallermillu tusarniaanermut akissutinik tigusaqartoqarpoq.

Tulliuttut siunnersummut oqaaseqaatitalinnik tusarniaanermut akissummik nassiussipput: Sulisitsisut.

Tulliuttuni tusarniaaffiit oqaatigisai pingarnerit nalinginnaasumik allanneqarput, Naalakkersuisoqarfiullu oqaatigiumasai *uingasumik* allanneqarlutik.

Siunnersuummi § 1, nr. 1-imut Sulisitsisut akileraartinneqannginnermut isumaqataasut oqaatigaat, taamaalillunimi Kalaallit Nunaat nunat allat assigalugit aaqqiissusiorluni suliffeqarfifit pineqartut pitsaanerpaamik atugassaqartinnissaannik aaqqissuussivoq.

Siunnersuummi § 1, nr. 14 pillugu, Aatsitassanut Inatsisillu atuutsinneqarnerannut Naalakkersuisoqarfik allaffissornikkut akissuteqaamminni, inatsisartut inatsisaanni § 40, imm. 5-imi inatsisisatallu siunnersuummi "Ingerlatseqatigiiiffit suliffeqarfifillu, Kalaallit Nunaanni atortussiassat aatsitassanit pisut il.il. pillugit inatsit naapertorlugu pisinnaatitaaffeqartut aningaasarsianit akileraarutaat, tamatumani ilaallutik iluanaarutisianit akileraarutit, landskarsip pisassari" atuarneqarsinnaavoq. Aatsitassanut Naalakkersuisoqarfifup oqaasertaliussat eqqortuugunarnerat maluginiarpaq, taamaattoq namminersorlutik oqartussat akuersissuteqartunit aatsitassanit isertitaasa aatsitassanut aningaasaateqarfimmuit nakkartinneqartarnerat maluginiaqqullugu, tak. Kalaallit Nunaanni Aatsitassanut Aningaasaateqarfik pillugu Inatsisartut inatsisaat.

Tusarniaanermut akissutit aatsitassarsiornermit iluanaarutit aatsitassanut aningaasaateqarfimmuit ikineqartarnerat pillugu nassuaatini erseqqissaanissamik pissutissaqalersitsivoq.

Namminersorlutik Oqartussat isertitai tamarmik nunatta karsianut ukiumullu aningaasanut inatsimmut ikineqartarput. Tamanna Kommunit Namminersorlutillu Oqartussat missingersuutaat naatsorsuutaallu pillugit Inatsisartut inatsisaanni § 8 ima oqaasertalik malillugu:

"Aningaasaliissuteqartoqaaqqaartinnagu aningaasartuuteqartoqassanngilaq aamma isertitaqartoqassanngilaq, taamaattoq tak. § 23, imm. 2". Aalajangersagaq Tunngaviusumik Inatsimmi § 46 naapertorlugu marloqiusamik tunngaveqarnissamik piumasaqaammuit

atatillugu isigineqassaaq, kingornalu aningaasanut inatsimmik aningaasaliinermulluunniit inatsimmik akuerineqartumik tunngaveqarnani akileraarutinik isertitaqartoqarsinnaanngilaq. Nunatta karsiata isertitami ilai, aatsitassanit isertitaneersut, aatsitassanut aningaasaateqarfimmut nakkartinneqarnerannik aalajangersaaneq, tunngaviusumik aningaasaliinermut pissutsinut sunniuteqanngilaq.

Tusarniaanermut akissuteqartut sinneri akileraaruserinermik ingerlatsineq pillugu allannguutissatut siunnersummut oqaatigisassaqanngillat.